

'Zabalza kasua'

Zabalza Intxaurrondon hil zelako bertsioa indartu du komisario baten deklarazioak


Soria guardia zibil ohiak komunikabideei esandakoaren berri izan zuela dio

Axun Erribengoa / Donostia

Enrique de Federico komisarioak deklaratu zuen atzo *Zabalza kasuan*, Donostian. Polizia horrek ikertu zuen *Lasa-Zabala kasua*, eta atzo esan zuenez, ikerketa horretan ari zen bitartean jakin zuen Vicente Soria guardia zibil ohiak zenbait komunikabideri Zabalzaren heriotzaren inguruko informazioa eman zuela. Deklarazio horrek bere garaian zenbait kazetarik eginikoak indartzen dituela iritzi dio akusazio partikularrak.

DE FEDERICO komisarioak Margarita Robles Segurtasunerako estatu idazkari ohiaren aginduz zuzendu zuen *Lasa-Zabala* auziko ikerketa. Ikerketa hori egin zuenean Polizia Judizialeko komisario nagusia zen De Federico, eta ikerketa horretan *Zabalza* auzia argitzeko daturik izan ote zuen azaltzeko deklaratu zuen atzo Donostian, lehenengo instrukzio epaitegian, Augusto Maeso epailearen aurrean.

De Federicok esan zuenez, *Lasa-Zabala* auziko ikerketa egiten ari zenean «iturri fidagarri eta sinesgarrietatik» jakin zuen Vicente Soriak —guardia zibil izana da— zenbait komunikabideri



JUAN HERRERO / EFE

Iñigo Iruin, akusazioko abokatua, atzo, kazetariei adierazpenak egiten.

Zabalzaren heriotzari buruzko datuak eman zizkiela, eta zehazki *El Mundo*, *Diario 16* eta *El sur y su entorno* egunkariak aipatu zituen.

Soriak, 1995ean, egunkari horietako zenbait kazetariri adierazi zien 1985eko azaroaren 26an Mikel Zabalza atxilotu zutenean Intxaurrondoko kuarteleko igogailu bat

konpontzera joan zela, eta igogailuan besteak beste Zabalza ikusi zuela, bustita, lan-jantzi urdin batekin, eta berarekin zeudenak «hil egin-go zaigu» esaten zutela. *El Mundo*-k kaleratu egin zuen informazio hori. Ondoren, Donostian deklaratu zuenean, Soriak ukatu egin zituen hedabideetan agertutakoak.

El Mundo eta *Diario 16*-ko kazetariak, ordea, Soriak adierazpen horiek egin zizkiela berretsi zuten epaitegian.

De Federicok esan zuen berak ez zuela *Zabalza kasua* ikertu, baina erantsi zuen aipatu datua jakinarazi zela Fernando Andreuri —orduan ikerketa zeraman epaileari— eta Luis Navajas fiskalari.

Bestetik, Intxaurrondoko kuartelean telefonogunean lan egiten duen guardia zibil batek deklaratu zuen. Esan zuen Soria ezagutzen duela, besteak beste Donostiako banketxe batean zainketa lanak egin zituztelako. Datu bera eman zien Soriak kazetariei, baina gero epailearen aurrean ukatu egin zuen aipatu guardia zibila ezagutzen zuela.

Iñigo Iruin akusazio partikularreko abokatuaren ustez, atzoko deklarazioek adierazten dute jarraitu beharreko ikerketa bidea Vicente Soriaren deklarazioen ingurukoa dela. «Deklarazioek indartu egiten dituzte kazetariak Soriari buruz epailearen aurrean esandakoak. Bestetik, Soriak epaitegian komunikabideei esandakoa gezurtatzeko eginiko ahaleginak indarra galtzen du». Ildo horretatik, Soria berriz deklaratzera deituko duela esan zuen Iruinek. Eginbide gehiago eskatuko dituela ere azaldu zuen.

Joxemi Esparza
gaur kanporatuko
duten kezka
adierazi dute
AABek

■ *Bihar beteko du osorik Frantziar jarritako zigorra*

Erredakzioa / Donostia

JOXEMI ESPARZA euskal presoak bihar beteko du, oso-osorik, Frantziako epaileek jarritako zigorra. Hala ere, Esparzari, hiru urteko espetxe zigorraren gain, Frantziar eta Ipar Euskal Herrian bizitzeko debekua ezarri zioten epaileek, eta horrenbestez, gaur kanporatu eta Espainiako Poliziaren eskuetan geratuko den beldurra azaldu dute Amnistiaren Aldeko Batzordeek.

Esparza Hendaiakoa da (Lapurdi), eta aipatzekoa da orain arte Iparraldeko biztanleei ez dietela horrelako debekurik jarri. Hegoaldeko biztanleak kanporatu izan ditu Frantziak. Hala ere, eta Espainiako Justiziarekin inolako arazorik ez duen arren, beste hainbat kasutan gertatu den moduan Espainiako Poliziak atxilotuko duen kezka agertu dute AABek. Hain zuzen, aurtun Frantziak zazpi pertsonari debekatu die Iparraldean bizitzea.

Esparza 1997ko otsailaren 25ean atxilotu zuten, beste bi lagunekin, Gazte-riak erankundearen inguruan eginiko polizi operazio batean. Fresnaseko kartzelan dago egun, eta seguruenik handik eramango dute mugara.